

–Ինքզինքնիդ մի՛ նեղեք, տիկին. եթե կ'ուզեք՝ բերան չեմ շիներ ամենեւին:

•

Համբակ սափրիչ մը հարցուց մարդու մը, զոր կ'ածիլէր.

–Քանի՞ եղբայր էք:

–Եթե սրկեց ողջ առողջ դուրս ելլամ՝ չորս եղբայր ենք,– պատասխանեց ածիլուողը:

•

–Ո՛հ,– կ'ըսէր հիւանդ մը.– մարդ չի գար զիս տեսնելու:

–Այդպէս պետք է որ ըլլայ. քեզի ո՞վ ըսաւ, որ պարտքերդ վճարես:

•

Երկու եղբայրներ այնչափ շատ կնմանէին իրարու, որ անոնց դրացին անգամ չէր կրնար զանոնք իրարմէ որոշել:

Ասոնցմէ մէկը կմեռնի. դրացին օր մը միւսին հանդիպելով կհարցունէ.

–Աստուածդ սիրես, ըսէ՛ ինձի, դո՞ւն մեռար թէ եղբայրդ:

•

–Պարոն Յակոբ, Քեաղըտխանէն ախորժեցա՞ր նայինք, կրցա՞ր լաւ մը զուարճանալ:

–Շիտակը՝ շատ աղուոր տեսարան ունի ձեր Քեաղըտխանէն. բայց բազմութիւն շատ ըլլալուն աղէկ մը համը չառնուիր կոր. թէ որ այնչափ բազմութիւն չըլլայ նէ՝ շատ մարդ պիտի երթայ հոն:

•

Երկու քոյր խնդրոյ մը համար դատարան կներկայանան:

Նախագահն ասոնց մեծին կը հարցնէ.

–Քանի՞ տարու էք, օրիորդ:

–Քսան եւ ութը տարու եմ, պարոն նախագահ:

Նախագահը պզտիկին դառնալով կը հարցնէ.

–Դուք քանի՞ տարեկան էք:

–Երեսունըմէկ տարեկան, պ. նախագահ:

Նախագահն դիւանադպրին դառնալով կ'ըսէ.

–Չըլլայ որ սխալ արձանագրես. անդրանիկը պզտիկն է: